

Sp. 281. Tillaga til þingsályktunar

um landsvistarleyfi nokkurra útlendinga.

Flm.: Sigurður Bjarnason, Hermann Jónasson.

Alþingi ályktar að fela dómsmálaráðherra að veita þeim Þjóðverjum, sem kvæntir eru íslenskum konum og búsettir voru hér á landi árið 1939, landsvistarleyfi á Íslandi nú þegar, enda hafi þeir ekki orðið uppvísir að því að hafa rekið hér starfsemi í þágu erlendra ríkja, sem hættuleg geti talizt hagsmunum Íslendinga, eða framið aðra verknaði, sem ósæmilegir séu að almenningsáliti.

Greinargerð.

Tillaga þessi skýrir sig sjálf. Hún er fram komin vegna þess, að hæstv. dómsmálaráðherra hefur ekki talið sér fært, án viljayfirlýsingar Alþingis, að veita nokkrum Þjóðverjum, sem hér höfðu dvalizt fyrir árið 1939 og eiga hér konur og börn, landsvistarleyfi. Að sjálfsögðu gera flm. tillögunnar ekki ráð fyrir því, að nokkrum þeim, sem orðið hefur uppvís að því að reka hér erindi erlendra þjóða, sem hættuleg geta talizt hagsmunum Íslendinga, verði veitt hér slíkt landsvistarleyfi. En hitt er öllum augljóst, að ekki er hægt að láta hina saklausu gjalda hinna seku um langan aldur. Slíkt athæfi mundi ekki aðeins bitna á fáeinum útlendingum, heldur og bágstöddum íslenskum konum og börnum, sem enn þá siður hafa til saka unnið.

Hér er fyrst og fremst um mannúðarmál að ræða, sem of lengi hefur dregizt að ákvörðun yrði tekin í.